



केशरमान ताम्राकार

थाय्बाय् : शिकागो, अमेरिका
मोबाइल/फोन

पौ

सुमन ज्यां लिहांवःगु थौं न्हापा लिपा स्वया भचा लिबाः । न्याचःनिसैं दाजु मवःनि धकाः धन्दा कयाच्वंम्ह तिमिलां सुमनया सलें सासः ल्हात । च्या छगू नि दायेके धकाः भुतुली वंम्ह तिमिलां दाइ थौं छाय् लिवात धकाः न्यने हे त्वःमंकल । वयाकथं सुमन थःगु कोथाय् वन । खातासं पलख ग्वःतुल । त्यानुचाः खनेदु । पलख मिखा तिसित । छाय् खः मस्यू । थौं यक्व ज्या दयाः त्यानुगु खः वा मेगु हे छुं समस्या वःगु खः । वं जक स्यू ।

च्या ज्वनाः तिमिला कोथाय् वल । तिमिला वःगु सः ताया सुमन खातां जुरुक्क दनाः लासाय् तुं फय्तुल । तिमिलां च्याया कप सुमनया ल्हाती तयाबिल ।

- दाइ, छाय् थौं ज्यां वःगु लिवात नि ? तिमिलां

न्त्यसः तल । सुमनं छयं जक संकल । केहँया न्त्यसःया लिसः म्हुतु वायेका मब्यू ।

- दाइ, मेगु छुं नयेगु ला कि ? मरी छुइ धुनागु दु । छकलं नयाछवये कि ?

सुमन च्या सवाः काकां त्वनाच्वन । तिमिलां भसक्क लुमंकल । न्हिनय् पोष्टमाय् नं दाइया नामय् छगू पौ बिया थकूगु ।

- दाइया पौ वःगु दु । तलय् भुतुली दु । कया हये' धयाः तिमिला कोथां पिहांवन ।

सुमनयात चिठी मवःगु धैगु यक्व दयेधुंकल । गनं वल ? वं तिफ्याये मफुत । च्या म्हुतुइ ततं हानं छकः विचाः यात । गनं उखुनु ज्या छगूया लागी निवेदन तया थासं अन्तरवार्ताया लागि सःता हःगु पौ ला कि ? थः थम्हंतुं न्त्यसः तल । अन ज्या जूसा ला तसकं बांलाइगु खः । यक्वस्यां निवेदन तःगु दु धाःगु । खः हे खःसा जिल । बांलाक इन्टरव्यू बी माली । सुमन थः थम्हं मुसुक्क न्हिल । कोथाय् पौ छपौ ज्वनावःम्ह तिमिला दाजुया ख्वाल्य् न्हिला खनाः अजूचाल । पौ सुमनयात लः ल्हात । पौ कयाः बांलाक स्वल । खः पौ सुमनया नामय् हे वःगु । पौ नेपालं मखु विदेशं वःगु जुयाच्वन । सुनां वैत थथे विदेशं पौ च्वयाहल ? पौया देपा पाखे कुंचाय् च्वयातःगु नां खंबलय् वं सिल पौ सिलां च्वयाहःगु । सिला सुमनया यःम्ह, कलेजया मिसा पासा । म्हिगः सुमनया म्हागसय् वयाः दुग्यंक खँ कनाच्वंम्ह । थौं वैगु हे पौ सुमनयात वयाच्वन । सुमन पलख वाताहां जुल ।

- दाइ चिठी ब्वनाः थाहां वा । नयेगु ठीक यानातये । तिमिला तलय् वन । सुमनं पौ प्वल । मन मनं ब्वनायन ।

यम्ह सुमन,

गनं थ्व पौया शुरुवात याये धाये मसल जिं । विदेश वंसांनिसें अप्वः धैघें च्वयेगु ज्या अंग्रेजी भाषं जक जुयाः थःगु भासं च्वयेत भचा थाकु थें याःगु खः । तर कलम जक ज्वनेवं थःगु भासं थुलि अःपुक वनी धकाः बिचाः तकं याये मफुत । आखिर भी मनु खः । थःगु देशं न्ह्याये मदुगु विश्वया गुगु नं थासय् च्वसां थःमं मचांनिसें ल्हानावयागु भाय् वं च्वयाः वयागु आखः गबले ल्वःमनी मखु । उकिं जिं थौं थःगु हे भासं पौ च्वयाः च्वना तापालं अथेधयागु अमेरिकां । खला जिगु पौ स्वयेवं थ्व पौ गनं वःगु धकाः सीकेधुंकल जुइ ।

पौ ब्वना च्वनागु ला खः ला ? हानं थ्व थः मखुम्ह, थःत त्वःतावम्ह धकाः मती तयाः थ्व पौ कुचा कुचा यानाः नेष्ट बकसय् तइ । पलख, अथे यानादीमते । अथे यायेमाःसा पूर्वकं थ्व पौ ब्वनेधुंकाः जक यानादिसं । जिगु कोटी कोटी आग्रह ।

आः छकः लुधकं थःगु खँ कनेत्येना, भचा हे मछाः मजुसे । जि न्हापा सिक्क हे मछाःम्ह मिसा । सुं लिसे मिखा मिखा ल्वाकाः खँ तकं ल्हाये गयाः । सिक्क हे मछाः । मिजंत लिसे खँ ल्हायेमाल कि ख्वाः स्वयामखु, ख्वाः क्वछुका खँ ल्हायेगु बानी । जिगु थ्व पहः खनाः जिमि सिक्क मिलेजूम पासा - छिं म्हस्यू नि - मन्दिरा शाक्य । वं जितः हायेके थें धाःगु । सिला, छ थपाय्चवं मछाःगु खनाः ला ग्यासैं वः । छन्त बियाछ्वइबलय् भाःत लिसे तकं मछालाः थःछेंय् बिस्त्युं वनाच्चनी । थ्व खँ लुमनीबलय् आःतकं म्ह पीसे च्वनावइगु । व उगु ईया खँ जुल । अय्धयागु स्कूलय् ब्वनाच्चनावलय् एस.एल.सी. बी न्ह्यःया खँ खः । मेगु छता खँ, मिस्त जक दुगु स्कूलय् ब्वनागुलिं अथेजुगु खः वा जिं मस्यू । जब जि स्कूलं क्याम्पसय् वना । मिस्त जक मखु मिजंत नं दुगु ब्वनेकुथी जुल । क्याम्पसय् पलाः तयेवं नं जिगु मछाः पहलय्

उलि ह्यूपा मवः । ला बला लिपा जिगु मछाः पहलय् छुं कथंया परिवर्तन वल । छायाःसा जिमि पासापिं नं मिजंत लिसे पासा दयेका यंकल । इमि ल्यूल्यू वनेबलय् मिजंत लिसे खँ ल्हायेगु बानी जुयावन । मिजंत लिसे भचा अप्वः खँ ल्हायेगु बानीया ल्यूल्यू मिजंत पाखे खःथें मखुथें जिगु नुगलं आकर्षित याना यंकल । खंखीपिं मिजंत बांलाः तायावन । तर दकले बांलाःम्ह जिगु नुगलं ययेकूम्ह छि हे जुयाबिल - सुमन । छि लिसेया स्वापू न्हिया न्हिथं अप्वयावन । नुगलं मचायेक साला यंकल । जिं स्यू, छिगु नुगलं नं उकथं हे सालावंगु जुइमाः । अथे खयाः नं भी निम्हेस्यां म्हुतुं खँग्वः पिकया यंकेमफुत - जिं छन्त ययेका । अंग्रेजी भासं धायेगु खःसा I Love you । छिं स्यू, जिं छित सिक्क यः । जिं स्यू, छिं जितः थः स्वयां यः । थुकथं ययेकु ययेकुं भी ग्वदं बिका मौन जुया । जिगु थ्व न्ह्यःया लिसेः छिके दु, जिके दु । थथे ययेक ययेकं नं भी छगू रथया निगू घःचाः जुइमफुत । जिं निकः स्वकः जक मखु च्याक्वः फ़िक्वः तक मिखाभाय् यानागु खः । नुगःया भासं ख्वाःपाः ज्यानागु खः । थुया नं मथू पहः याःगु खः जिं मसिल । छि तप्यंक न्ह्यःने मवः । जिं अबलय् बिचाः यानागु खः - मिजंत धयापिं न्ह्यावनीपिं खः । लिज्या वनीपिं मखु । तर छि Neutral जुयाबिल । जि नं तप्यंक न्ह्यावने नं ग्यात । थुकिया लिच्वः भी ला व लुसि खयाः नं छखे छखे जुल । जुजुं महादेश हे अलगगु थासय् बाय् कायेमाल । अय्धयागु जि यस्सैं मखु बाध्यतां जि इहिपा याना । छम्ह ब्वनातःम्ह तर आर्थिक उलि सम्पन्न मखुम्ह मिजं लिसे । शैक्षिक योग्यता जिमि मिजंयात उगु देशय् थ्यंकाबिल गुगु देशय् ब्वनातपिन्त यक्व कदर दु । सम्मान दु । भौतिक सुविधा दु । इहिपा लिसें जिगु बाय् हिल । नेपालं अमेरिकाय् । पोष्ट डक्टरेट यायेत अमेरिकाया नां जाःगु विश्व विद्यालय नर्थ वायसटर्न युनिभरसिटि (Northwestern University) या नांजाःम्ह प्रोफेसर

डा. वाटसनया सिफारीसं जिमि मिजं मिलनयात दच्छिया न्ययद्वः डलरया छात्रवृत्ति प्राप्त जुल । जिपिं निम्ह लय्ताया । जि मिलन लिसे दक्क पक्षय् लय्ताया । तर छकः निकः जिगु न्त्यसःयात लिसे बिया जितः कयेच्याना कायेमफुम्ह छि बारे नुगलय् खँ दासी वाइगु । थ्व स्वाभाविक खः । न्हापांगु ययेका हे न्त्याबलें लुमनाच्वनीगु लुमन्ति जुइ । न्त्यागु थासय् च्वंसां, न्त्यागु देशय् वंसां, वहे लुमन्ति सुत्तु सूवइगु । थ्व छगू ध्रुवसत्य खः ।

यक्व हे च्वये धुंथें च्वं । जिं ला ख्वार् हे च्वयायंका थःगु नुगः खँ । तर छिं जितः पलख लुमंका मच्चं जुइ वा च्वल नं जुइ । जि मसीका सुला सुला । फुंगा तलय् पंपं थःगु नुगःखँया पाना पाना स्वथन जुइ । खला छि च्वयेसःम्ह छम्ह च्वमि नं खः । छिगु च्वसां अन्याः अत्याचारया विरुद्धय् सः तयाः न्त्यावंगु नं खनागु दु । न्हापा क्याम्पसय् च्वसु च्वयाः सिरपाः काःबलय् जिं तसकं लापा थानागु लुमन्ति अक्क जिंके दनि । च्वसुया भ्वलय् छत्वाःचा खँ न्त्यथने । उखुनु नेपालं निम्ह साहित्यकारत विश्व साहित्य सम्मेलनय् ब्वति कायेत थन भाःगु इलय् छिगु बारे खँल्हाबल्हा जुल । छिगु च्वज्या, संघर्ष व ज्या मदया इपां थिपां मसियाच्वंगु नं कन । अनलि छित ज्या लूगु खँ न्यनेदयाः सिक्क लय्ताः वल - दुनुगलं निसें ।

जिगु पौ ब्वं ब्वं त्यानु ला मचाः खला ? थौं मिलन छगू सेमिनारय् व्यस्त । मेगु हे स्टेटय् वनाच्वंगुलिं थथे मन लुधकं च्वयेफत । उखुनु छकः मती वःगु खः इमेल च्वये धकाः । इमेलया address फेसबुक पाखें मालागु नं खः । इमेल च्वये ग्यासैं वल । मच्चया । फेसबुक पासा request यायेगु नं आँट याये मछाल । बरु उकिया पलेसा छि पासां ब्यूगु छिगु छँया ठेगानाय् पौ च्वयेगु आँट याना । जितः थन सकतां दु । माया याइम्ह मिलन दु ।

च्वनेगु लागी बांलाःगु न्हू कथंया अपार्टमेन्ट दु । म्हतिं छगः छगः मोटर दु । मिलनया ला धाये हे म्वाःल, जिं नं छगू ज्या शुरु याये धुनागु दु । छगू फाइनान्स कम्पनी । थथे दक्क दयां नं गबलें गबलें छता चीजं घां लाकातये यः थ्व संसारय् । छगू छगू दुःख ला दया हे च्वनीगु खनी, मनूतय्त । पूर्ण मजुसे छता छतां अपूर्ण जुयाच्वनीगु । थ्व छु अपूर्णलय् - धया हे छ्वये । ब्याहा याये धुनेवं प्रत्येक मिं व मिसा थःगु छँय् थः मस्तय् सः न्यनेयइ । अक्क ला मिजंतय् स्वयां मिस्तय् मां जुयाः मातृत्व क्यनेगु इच्छा जुइ । मस्तय् ल्हाः ज्वना सपरिवार चाःहिले यइ । जिं धायेत्यनागु मूखँ ला भचा भचा थुइके धुंकलजुइ । जिमि छँय् आःतकं जिमि मचां बास काःमवःनि । खला अमेरिकाय् मचा मदयेक जीवन हनाच्वपिं यक्व त्यपूत नं दु । भाःत मदयेकं मां जुयाच्वपिं नं यक्व दु । कलाः मदयेकं बौ जुयाच्वपिं नं मदुगु मखु । तर जिपिं व वर्गया मनूत मख्याबिल । छगू सुखी परिवारया छँ दयेके न्त्यापिं त्यपू जुयाबिल । जिमिसं यक्व परिक्षण नं याना । यक्व कुतः नं यानाः छम्ह मचाया लागी । न्त्याक्व परिक्षण याःसां जिपिं निम्हेसिनं छुं दोष मदु धका लिच्वः बीगु । अन्तत वंगु वालय् छगू लिच्वः वल न्हूगु spermatogly defect या बारे अनुसन्धान कथं मिलनयाके सकतां दयाः नं गर्भाधान जुइबलय् डिम्बया सतह तछ्याये माःगु छताजी इन्जाइम तसकं हे म्हो जूगुथें खनेदत । थुगुया लागी आःतक छु उपाय पत्ता लगे मजुनि । अले थ्व Dificiency लाखौं मनूतय् छम्ह मिजंतय्के जक जूगु धकाः पुष्टी यानाबिल अनुसन्धानं । थय्धैगु मिलन गबलें अबु जुइ फइमखुत । थ्व खँ न्येनाः जिपिं निम्ह थ्वचा ला फाता फाता जक पुलाच्वना । घंसा घनेमफु । नसा सवाः मदु । च्वं च्वं थें च्वनेमछु । जिला स्वन्हु प्यन्हु तकं ख्व जक ख्वयाच्वना । तर ख्वयां छुं लगे जुइ मखुत । जिमि दथुइ खँ ब्याका । आः छु यायेगु लें ? मचा छम्ह कयाः धर्मपुत्र वा

धर्मपुत्री कथं लहीगु । थ्व थन जक मखु नेपालय् नं चले जू । जिं स्यू । थ्व नं जिमित मयल । जितः जक मखु मिलनयात नं मेपिनि मस्त मखु जिगु हे प्वाथं पिहांवइम्ह मचा माःगु जुयाबिल । मिलनं तःगु प्रस्ताव बांमलाःगु मखु । थौकन्हय् तःमिगु दशं लिसें कयाः चिमिगु देशय् तकं जू । मां जुइगु गूण मदुपिं मां जुयाच्वंगु दु । बौ जुइ असमर्थपिं बौ जुयाच्वंगु । अभं विकसित देशय् ला मां जुइ न्त्यापिं मिसा छ्वाया लागी मेम्ह मिजं लिसें चंवनी । अथे हे बौ जुइ न्त्यापिं मिजंत मेम्ह मिसा लिसे चंवनी । व मिजंया मचा मेम्ह मिसां प्वाथय् तक विकास यानाबी । इमिगु मां जुइगु वा बौ जुइगु रहर थुकथं पूर्वकाच्वनी । अज्याःगु हे मध्ये छगू सल्लाह मिलनं कन । जिमिगु थ्व खँ न्येना छ ग्यात जुइ । ख्वालय् मिच्याकल जुइ । मखु, जि थनया भुयूचात लिसे चंवने त्येनागु मखु ।

युग ह्यूलिसे मनूतय् बिचाः पानावनी । ह्यूपाःया लिसें लिसें मनूतसैं न्हू न्हूगु प्रविधि हयेत सनी । विज्ञानं न्हू न्हूगु आविश्कार याइ, मनूतय् आवश्यकता व सुविधाया लागी । उकिं जिमिगु आवश्यकताया लागी तसकं न्हूगु ला मखु, पुलां जुइ धुंकूगु प्रविधि Test tube Baby या लँय् वनेत्येनागु दु । आः बल्ल छिं थुल जुइ । जिपिं न्त्यांवने त्येनागु लँपुयात खःगु लँपु ल्यल धकाः बिचाः याइ । खला थ्व ज्या जिमिसं थन हे यायेगु धकाः बिचाः यानागु खः तर थन सिक्क थिके । थिके जक मखु, मेता खँ । मिलनं धाल यदि थनयात धाःसा व मचाया खाः भुयुचा खाः वा हाकुचा खाः जुयाः जन्म जुइ । मिलनयात थ्व मयल । जितः नं मयः । उकिं थ्व ज्या नेपालय् हे वयाः पूर्वकेगु मत्ती तया । नेपालय् सु डाक्टर धाल लिसे सल्लाह यायेत फोन वा इमेलं च्वये त्येनागु दु । नेपालय् याकनं थ्व हे दँय् वयाः जिगु मां जुइगु वा मिलनया बौ जुइगु इच्छयात नं

पूर्वकेगु बिचाः यानागु दु । नेपालय् नं sperm bank चालेधुंकूगु खँ न्येना । उकिं डाक्टर लिसे सल्लाह यानाः बांलाःगु छगू Sperm पाखें ज्या कायेगु बिचाः मिलनं यात । जिं ज्यू धकाः सहमति बिया ।

जिगु थ्व पौ सिक्क ताहा जुल खला ? हानं छकः धाये जिगु थ्व पौ ब्वंब्वं दिक्क ला मचाः ला ? थः हे मनू तायाः जिगु नुगलय् दासीवःगु खँ दकले न्हापां छितः हे कनाच्वना । जिगु नुगः खँ भतिचा सालायंके न्हिं । खला Test Tube Baby प्रविधिं यानाः त्यपूजीवनया छगू ह्यूपा हयाच्वंगु दु । लसता हयाच्वंगु दु । जिपिं नं लय्ताइ, जिमिगु त्यपूजीवन छगू रौनक वइ, शक्ति वइ । जिमिगु छँय् मचा सः न्येनेदइ । व मचा छम्ह नेपाःमिया मचा जुइ । जिगु न्हाय्, मिखा, सः, म्हुतुसि छगू छगू व मचायाके दइ । तर व मचायाके म्ह मस्यूम्ह मिजंया न्हाय्, मिखा, सं वा न्येताः वयेके जितः मयल । उकिं थ्व ताहाकयेक पौ च्वयाच्वना । तप्यंक मछ्छाः मजुसे धयाछ्वये - थ्व खँ छिगु व जिगुया दुने जक जुइ । जिगु प्वाथं पिहांवइम्ह मचाया ख्वालय् छिगु हिसिचा दुगु न्हाय् वा मिखा स्वयेमास्ति वः । थय् धकाः जिं मिलनया उदारपनायात विश्वासघात यायेत्येनागु मखु । जिं छुं बिचाः यानागु धाःसा नि - मेपिनिगु Sperm जिगु प्वाथय् लाकेगु पलेसा थः हे नुगःया मनू जिगु प्वाथय् लात धाःसा भीगु अपूर्ण जूगु मतिनायात जिं लिपा तकं लुमंका च्वनेफइ । थ्व खँ तसकं गोप्य याना तये । भीगु पूर्ण जुइमफूगु मतिनायात ग्वाकेगुली छिगू पूर्ण समर्थन दइ । जि धुक्क ।

तापालय् च्वनाच्वनाम्ह सिला

पौ क्वचाल । सुमनया म्ह छम्हं चःति चःति जुल । थररर खात । ... ।

